

Ministère de l'Agriculture, de la Viticulture et du Développement rural, 8	
Référence: 49/2018	
24 JAN. 2019	CHAMBRE DES DÉPUTÉS Entrée le :
A traiter par	20 JAN. 2019
Copie à: CSV	258
FRAKTION	

Här Fernand Etgen
President vun der Chamber
Lëtzebuerg, den 23. Januar 2019

Esou ewéi den Artikel 83 vum Chambersreglement et virgesäit bieden ech Iech dës parlamentaresch Fro iwwert déi afrikanesch Schwengspescht un den Här Landwirtschaftsminister an un Madamm Minister fir Ëmwelt weiderzeleeden.

Och wann déi afrikanesch Schwengspescht aus de Medie verschwonnen ass, ass Gefor déi vum Virus ausgeet an de Risk vun enger Kontaminatioun mat den Hausschwäin allgéigewäerteg. Net méi spéit wei läschte Freiden ass e weidere Fall vun afrikanescher Schwengspescht am Raum Arel confirméiert ginn. De Kadaver ass an engem Besch zu Sesselich 2 Kilometer vun Arel ewech fonnt ginn, un der Limitt vun der bestoender „zone tampon“.

An dësem Kontext wollt ech dem Här Landwirtschaftsminister an der Madamm Minister fir Ëmwelt folgend Froe stellen.

- Kann d'Regierung de Bilan vun de Preventiounsmesurë maachen, déi getraff gi sinn zënter de Virus eng éischte Kéier an der Belsch konnt nogewise ginn ? Wat gouf an dëser Zäit konkret fir Schwengsproduzente gemaach ?
- Duerch de massive Präisréckgang beim Schwéngfleesch stinn eis Betriber viru massive wirtschaftleche Problemer. Wéi huet de Minister wëlles eis Schwengsproduzenten an dëse schwieriger Situatioun ze ënnerstëtzen?
- De Präis fir d'Wëllschwäin ass déif gefall. Ginn nach genuch Schwäi geschoss fir d' Gefor ze reduzéieren?

Här President, ech bieden Iech mäin déifste Respekt unzehuelen.



Martine Hansen
Députéiert

Réponse commune du Ministre de l'Agriculture, de la Viticulture et du Développement rural et de la Ministre de l'Environnement, du Climat et du Développement durable à la question parlementaire n°258 de l'honorable députée Madame Martine Hansen

Kann d'Regierung de Bilan vun de Preventiounsmesurë maachen, déi getraff gi sinn zënter de Virus eng éischte Kéier an der Belsch konnt nogewise ginn? Wat gouf an dëser Zäit konkret fir Schwengsproduzente gemaach?

Duerch de massive Präisréckgang beim Schwéngfleesch stinn eis Betriber viru massive wiertschaftleche Problemer. Wéi huet de Minister wëlles eis Schwengsproduzenten an dëse schwierege Situatioun ze ënnerstëtzen?

De Präis fir d'Wëllschwäin ass déif gefall. Ginn nach genuch Schwäi geschoss fir d'Gefor ze reduzéieren?

Zënter déi éischt Fäll vun Afrikanescher Schwéngspescht Mëtt September detektéiert goufen, sinn eng ganz Rei Informatiounen un d'Bauern aus dem Schwéngssektor weider geleet ginn. D'Veterinärsverwaltung huet dësweideren eng Versammlung mat alle concernéierte Baueren organiséiert an där nieft der Krankheet och d'Biosécherheet an de Betriber e groust Thema war, iwwer dat diskutéiert gouf.

Et ass och een Update vun der Datebank vun de Schwéngsbetriber gemaach ginn an d'Betriber si vun den Inspekteren vun der Veterinärsverwaltung besicht gi fir si um Niveau vun der Biosécherheet anzuschätzen an eventuell Verbesserungsvirschléi ze maachen.

Och gouf et eng Informationsversammlung vun der Naturverwaltung an der Veterinärsverwaltung, fir d'Jeeër aus der "Zone de surveillance" déi un déi Belsch "Zone d'observation" grenzt, am Detail z'informéieren.

D'Vertreieder vum Schwéngssektor a vun de Jeeër sinn och Member vun der "Task Force" wou si kënnen hiert Uleies matdeelen an esou déi verschidden Aktiounen vun der Bekämpfung vun der Krankheet mat gestalten.

All d'Jeeër aus dem Land goufen ugeschriwwen, kruten d'Hygiènesregelen rappelléiert, a sinn opgefuerdert ginn all verdächtig Wëllschwäin beim zoustännege Revéierfierschter respektiv enger speziell heifir ageriichter Hotline ze mellen.

De Grand Public, d'Stroossebauverwaltung an d'Police sinn och opgefuerdert ginn, verdächtig Wëllschwäin respektiv Carcassen ze mellen, a maachen dat och. D'Fierschter vun der Naturverwaltung si forméiert ginn, fir déi verdächtig Carcassen ze transportéieren oder ze beprouwen. De Veterinärlabo huet bis elo 106 Wëllschwäin, déi dout fonnt gi sinn oder verdächtig waren, op d'afrikanesch Schwéngspescht analyséiert. Bis elo waren all d'Resultater negativ.

De Marché vum Schwéngfleesch ass e relativ volatil an deem et vill Schwankunge gëtt déi duerch eng Rei vu Facteuren beaflosst ginn, wouvunner een déi Afrikanesch Schwéngspescht ass. Am Fall vun der Detektioun vum Virus, sief et an der nationaler

Wëllschwäinpopulatioun respektiv an engem Schwéngsbetrieb, huet dat haaptsächlech Konsequenzen op den Export vun de liewege Schwäin wou de Ministère da kann agräifen ënnert der Bedingung sech un déi europäesch Reegelung ze halen.

Wëssenschaftlech ass nach net festgestallt ginn, wéi grouss d'Reduktioun vun der Wëllschwäinpopulatioun misst sinn fir d'Gefor vun der Infektioun duerch de Virus ze verhënneren. Allerdings ass d'Situatioun am Fall vun enger Infektioun méi einfach ze géréieren, wann de Bestand vu Wëllschwäin méi déif ass. Dofir, awer och wéinst dem Wëldschued an de landwirtschaftleche Kulturen, ginn d'Jeeër säit Joren dozou opgefuerdert de Bestand ze verklengeren.

De Marchésprais vum Wëllschwäin war och an de leschte Joren net ganz héich, an et ass net gewosst wéivill Afloss de Prais vum Fleesch sech op den Ofschoss auswierkt. Eisen Informatiounen no goufen dës Saison (2018/19) an de Juegdousen, déi un déi belsch "Zone de Surveillance" grenzen, méi Wëllschwäi geschoss wéi an der Saison 2017/18. Offiziell Zuelen iwver d'ganz Land hu mer réischt ee Mount no Ofschloss vum Juegdjoër.